



XM 2014/18

16/12-2014

Tillie Martinussen

Siunnersuut: ukiumut aningaasaliiffiusumut 2015-mut Inatsisartut akuersinissaannut inatsisaagallartoq pillugu Inatsisartut inatsisaata allanngortinnissaanut siunnersuut.

(Ukiumut aningaasaliiffiusumut 2015-mut Inatsisartut akuersinissaannut inatsisaagallartumut ilassut)

(Aningaasaqarnermut Aatsitassanullu Naalakkersuisoq)

Akisussaaffigaarput nunatta ingerlanissaa - taamaattumik pingaartorujussuuvoq ullumikkut akuersinissamut inatsisaagallartumik aalajangiussinissarput, Naalakkersuisut nutaat siunissamut isigisumik, inuussutissarsiortunut ikorfiisumik ineriartortitsisussamillu 2015-mut Aningaasanut Inatsisiliorniassammata.

Demokraatini aaqqiigallartarnerit nuannarinngilagut aamma taamaattumik iluarinngilarput kommunit akornanni 2015-mut naligiissaarinermut aaqqiigallartoqarnissaa. Piumaneruagut aaqqiissutit atasinnaasut, siunissami ukiunut arlalinnut pilersaarusiortoqarsinnaaqqullugu. Atasussamik aaqqiianianggikkallarnermut utoqqatsissutigineqarsinnaaqqooqaaq Inatsisartunut qinerseqqammernerput, taamaappalli utoqqatsissutipalaaginaassaaq. Qinersinissaq sioqqullugu qangali isumaqatigiittoqarsinnaasimagaluarpoq.

Taamaattumik sakkortuumik kommunit kaammattussavagut piaarnerpaamik pitsaasumik suleqatigiileqqullugit siunertaralugu naligiissaarinermut periusiliornissaaq, kikkut tamarmik akuersinnaasaannik.

Ersarinnerusariaqarpoq kikkut akiliissanersut kikkullu tiguisuussanersut. Tamatuma saniatigut aamma periuseq agguaanermi tunngaviusussaaq paasiuminarnerusariaqarpoq.

Taavalu naggataatigut; maluginiarpara Demokraatit pisuutinneqalereersugut neriorsuinerlussimasutut erngiinnannguaq naligiissaarinermut iluarsartuussinerugallartoq akueseqataaffigisussaagatsigu, tassani Kommuneqarfik Sermersooq kommuninut allanut akiliinerusartussanngorlugu. Pisuutitsiniutit taamaattut tunngavissaqanngilluinnarput.

Qineqqusaarnerup aallartinnerani - tassa eqqortumik Sermitsiami 24. oktober saqqummersumi - aviisip Demokraatit siulittaasuut imatut aperaa:

"Sermersooq kommunit akornanni kommunit akornanni naligiissaarinermut aaqqissuussinermut akiliinerussava"



Demokraatit siulittaasuut imatut akivoq:

"Aallaqqaammut paasinartumik naapertuuttumillu naligiissaarinermit periutsimik sanasoqartariaqarpoq. Maannakkut soqanngilagut. Tamatuma kingorna periutsip takutissavaa, siunissami qanoq naligiissarisooqartassanersoq. Tassunga atatillugu eqqaamassavarput ullumikkut Sermersooq milliuunerpasuarfik naligiissaarinermit akiliisareermat."

Isummamut tassunga assortuisumik isumaqanngilagut taamaattumik inussiarnersumik kisiannili aalajangersimasumik isumaqatigiinniarnermut peqataasut tamaasa sanaqqussavagut atasussamik naapertuuttumillu naligiissaarinermit periutsimik.

Taamatut oqaaseqarluta ukiumut aningaasaliiffiusumut 2015-mut Inatsisartut akuersinissaannut inatsisaagallartoq Aningaasaqarnermut Ataatsimiititamut innersuupparput.